

Lettres patêtes


DV ROY, PORTANTS
ITERATIVES DEFENSES,
sur les peines contenues en l'E-
dict de Pacification, de faire
aucun exercice de la Religion
pretendue reformee, en la ville,
forsbourgs, Preuosté, Viconté,
& ressorts de ladicte Preuosté
de Paris: fors & exceptéés lieux
establis & ordonnez par sa Ma-
iesté.



A PARIS;

Par Robert Estiène Imprimeur du Roy.

M. D. LXVII.





LETTRES PATENTES

D V R O Y, P O R T A N T S
iteratives defenses, sur les peines cō-
tenuës en l'Edict de Pacification, de
faire aucun exercice de la Religion
pretendue reformee, en la ville, fors-
bourgs, Preuosté, Vicôté, & ressorts
de l'adicté Preuosté de Paris : fors &
excepté és lieux establis & ordōnez
par sa Maiesté.



H A R L E S par la gra
ce de Dieu Roy de
France, à nos amez
& feaulx les Gēste-
nās nostre Cour de
Parlement, Preuost de Paris, ou ses
Lieutenans, Salut. Encores que
par nostre Edict de Pacification il
soit expressement prohibé & de-

fendu de faire aucū exercice de la Religion pretendue reformee, dedans nostredicte ville, forsbourgs, Preuosté & Viconté: Neantmoins nous sommes aduertis que contre & au preiudice de nostredict Edict, se sont faictes & font chascun iour plusieurs assemblees pour le faict d'icelle Religion, Presches, Baptesmes, Mariages, cueillettes de deniers, & autres exercices & actes qui apportent grád scandale parmy nos subiects, mespris & cōtemnement de nous & de nostre autorité. D'auātage qu'en plusieurs colleges & endroiets de nostredicte ville & forsbourgs se tiennent escholes, où l'on instruit & institue les enfans selon ladicte pretendue Religión reformee, au preiudice de nostredict Edict: chose que ne voulons estre toleree ne soufferte, ains

l'entiere obseruation d'iceluy nostre Edict, au bien & repos de nos subiects & manutétion de nostre auctorité, & de l'obeissance qui nous est par eux deüe.

P O V R C E est-il que nous vous mandons, commandons & ordonnons à chascun de vous endroict soy, que vous ayez de nouveau, à faire faire tresexpresses defenses & prohibitions de par nous, suyuant la teneur de nostredict Edict, à toutes personnes, de quelque estat, qualité ou condition qu'ils soyēt, qu'ils n'ayent à faire, ne souffrir faire en leurs maisons & domiciles, n'en quelque autre endroict de nostredict ville, forsbourgs, Preuosté, Viconté, & ressorts de ladicte Preuosté de Paris, prohibez par iceluy nostre Edict, aucunes Presches, Baptesmes, Mariages, le-

uee de deniers, tenir Escholes, instruire enfans, ne faire aucun autre exercice de ladicte Religion pretendue reformee, ne autre assemblee prohibee par nos Edicts, en quelque sorte que ce soit: le tout sur les peines portees par iceluy nostre Edict. Et mesmes à tous Ministres de s'ingerer & entreprendre d'y faire aucun acte d'icelle Religion: contre lesquels Ministres, en cas de contrauention, nous voulons estre procedé par la rigueur desdictes peines; & autres plus grandes, si le cas le requiert. N'entendons neantmoins les lieux esquels par nos Ordōnāces & Lettres patētes y a eu establissement dudit exercice (encore qu'ō pretēdist lesdicts lieux estre du ressort) estre aucune-ment compris esdictes defenses.

Si vous mandons & ordon-

nons à chascun de vous, Que ce-
ste presente ordonnance vous fai-
tes lire & enregistrer és greffes de
nostredicte Cour de Parlemēt de
Paris, & Preuosté dudit lieu, & pu-
blier à son de trompe & cry pu-
blic par tous les carrefours de no-
stredicte ville, & autres lieux de la
Preuosté & Viconté de Paris en tel
cas accoustumez: icelle garder, en-
suyure, obseruer & entretenir de
poinct en poinct, & contre les in-
fracteurs proceder ainsi que dessus
est dict: y vsant de tout debuoir &
diligence: en maniere que par vo-
stre soigneuse diligence les con-
trauētions à nosdicts Edicts soyēt
cogneues & auerees, & les coulp-
ables punis & chastiez à l'exemple
des autres. Car tel est nostre plai-
sir. De cefaire vous auons don-
né & donnons plein pouuoir, puis-
sance, auctorité, cōmission & man

dement special: Mandons & com-
mandons à tous nos Iusticiers, Of-
ficiers & subiects, que à vous en ce
faisant ils obeissent, prestent & dō-
nent conseil, confort, ayde & pri-
sōs, si mestier est, & requis en font.

Dōné à Paris le premier iour de
Iuin, l'an de grace M. D. LXVII. &
de nostre regne le septieme.

Signees Par le Roy en son Cōseil,

DE L' A V B E S P I N E.

Et sceelées du grand seal de cire
iaulne sur simple queue.

*LEVES, publiees & enregistrees,
oy & ce requerant le Procureur general
du Roy, à Paris en Parlement le vingt-
sixieme iour de Iuin, l'an mil cinq cens
soixante sept.*

D V T I L L E T.

Et le mesme iour ont esté par ordonnance
de la Cour publiees à son de trompes & cry pu-
blic és carrefours, lieux & endroits de ladicte
ville & forsbourgs d'icelle, accoustumez à faire
cris & proclamations.